

# L'eundrumia

*Texte et musique de Yvette Bullet*

Prèidjade-neun, de mon péi  
De sèn que l'é l'otonomi  
La nousa lènva queunta l'é  
Vo-ze demando prèidjade-neun.

Y é eun gran dezodre, deun ma vallée  
Lion que se batton avouè le polé  
É renouvellon todzor le méime dzé  
Desù l'idéal di leur eunteré.

É n'on vécù la rézistanse  
É n'on sondjà a l'eundependanse  
No-z-àn fa crèye no sarian vegnù  
Lo canton suisse de l'Italie.

É caque cou prètchon su l'idantité  
Reuston pi quèi pèndèn le prosé  
O baillon la coza i déforàn  
I nouvelle ézijanse di monde global.

Son no que n'on perdù la nousa chance  
É que prèidjèn patoué djeusto desù le palque  
Son no que n'on vèndù le nouse spèranse  
A la comodité de l'anti-patrie.

Y é eun gran silanse deun ma vallée  
To le tro tranquillo eun rialité  
É me demando se ara i dzor de ouéi  
Y é euncó qui pènze a l'espouar de mon péi.

É se l'èide oublià la rézistanse  
É se l'èide oublià le nouse revanche  
Rappellade-vo-zé no n'oublièn jamé  
Que son lo fouà dézò le seundre de mon péi.

É que n'on vécù la rézistanse  
É que n'on sondjà a l'eundependanse  
Pouade lèi crèye no continuèn a reustéi  
**Maîtres chez nous, ièr comme ouéi.**